

Delegati SNSD-a u Domu naroda Parlamenta FBiH

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 30-03-2022			
Org. jed.	Broj	Priloga	Vrijednost
02	-11-	2523	121

Parlament Federacije Bosne i Hercegovine

Dom naroda Parlamenta FBiH

n/r gospodina Tomislava Martinovića, predsjedavajućeg

Vlada Federacije Bosne i Hercegovine

n/r gospodina Fadila Novalića, premijera

PREDMET : AMANDMANI NA PRIJEDLOG BUDŽETA FEDERACIJE BiH ZA 2022. godinu

Na osnovu članova 177. i 178. Poslovnika o radu Doma naroda Parlamenta FBiH („Službene novine Federacije BiH“, broj 27/03 i 21/09) podnosimo sljedeće amandmane na Prijedlog budžeta Federacije BiH za 2022. godinu :

AMANDMAN I

U odjeljku 52, glava 5201 Federalno ministarstvo kulture i sporta, ekonomski kod 615 Kapitalni transferi, 6151 Kapitalni transferi drugim nivoima vlasti i fondovima – Izgradnja bazena Mostar iznosi 8.000.000 KM. Kod mijenja ime i glasi Izgradnja bazena Mostar i Izgradnja bazena Drvar, na način da dio koda Izgradnja bazena Mostar iznosi 7.250.000 KM, a dio koda Izgradnja bazena Drvar iznosi 750.000 KM.

Obrazloženje :

Sportsko rekreativni centar „Radomir Kovačević“ izgrađen je 1981. godine i sastoji se od glavnog fudbalskog stadiona sa tribinama i atletskom stazom, pomoćnog terena, teniskih terena, odbojkaškog i košarkaškog terena, terena za mali fudbal i rukomet, kao i tri bazena, i to olimpijskog, bazena za skokove u vodu i bazena za djecu, te smještajnog, restoranskog i kancelarijskog prostora. Na ovom kompleksu osamdesetih godina prošlog vijeka gostovali su najveći fudbalski klubovi tadašnje države, pripremali se vodeći sportski klubovi u BiH, održavana prvenstva BiH u atletici i plivanju, te realizovani značajni festivalski i koncertni događaji u kojima su gostovale brojne zvijezde tadašnje države.

Za razliku od drugih dijelova Sportsko rekreativnog centra koji su posljednjih godina djelimično renovirani i stavljeni djelimično u funkciju, za kompleks bazena do danas nije pronađen način njegovog finansiranja i renoviranja, kako bi se stavio u održivu funkciju na radost najmlađih i na zdravlje najstarijih stanovnika, ne samo opštine Drvar, već i susjednih opština s obzirom da u krugu od 100 km takav objekat ne postoji. Takođe, renoviranje ovakvog jednog objekta bi u ljetnom periodu obogatilo turističku ponudu opštine i time dodatno upotpunilo brojne prirodne ljepote koje krase ovaj kraj.

AMANDMAN II

U odjeljku 23, glava 2301 Federalno ministarstvo prostornog uređenja, ekonomski kod 615 Kapitalni transferi, 6151 Kapitalni transferi drugim nivoima vlasti i fondovima – Učešće Vlade Federacije BiH u sufinansiranju kantonalnih i lokalnih zajednica – Zaštita nacionalnih spomenika iznosi 1.540.000 KM. Ime koda se mijenja i glasi Zaštita nacionalnih spomenika i Rehabilitacija Spomenika žrtvama fašističkog terora 1941-1945 u Drvaru u okviru koga dio koda Zaštita nacionalnih spomenika iznosi 890.000 KM, a dio koda Rehabilitacija Spomenika žrtvama fašističkog terora 1941-1945 u Drvaru iznosi 650.000 KM.

Obrazloženje :

Spomenik ustanicima podignut je 1967. godine. Imao je četiri impozantna kraka, koji su simbolizovali borbu za slobodu na sve četiri strane svijeta sa reljefima na kracima koji su prikazivali detalje iz revolucionarne i oslobodilačke borbe, u čijem podnožju se nalazi spomen kosturnica za 265 boraca. Oko Spomenika su bile postavljene 33 mermerne ploče za sva sela u opštini na kojima su bila ispisana imena palih boraca. Stotinak metara od Spomenika ustanicima postavljen je Spomenik žrtvama fašizma za 778 žrtava. U podnožju parka nalazile su se biste narodnih heroja Drvara, njih 19. A cijeli kompleks je bio prožet zelenilom, pješačkim stazama i rasvjetom.

Nažalost 1996. godine Spomenik je srušen, kamene ploče uklonjene, biste narodnih heroja ukradene. I pored stalnih napora opštine Drvar i brojnih antifašističkih udruženja svih poslijeratnih godina da Spomenik žrtvama fašizma dobije prijeratni izgled, ovaj svojevrsni svjetski simbol borbe protiv fašizma i dan danas nije obnovljen i predstavlja sramotu cijele države i antifašističkog svijeta uopšte.

Podsjećamo da je Komisija za zaštitu nacionalnih spomenika još 2018. godine donijela Odluku o proglašenju mjesta i ostataka Spomenika žrtvama fašizma u Drvaru nacionalnim spomenikom Bosne i Hercegovine. Takođe, Zakonom o provođenju odluka komisije za zaštitu nacionalnih spomenika utvrđene su mjere zaštite i rehabilitacije dobara koja su proglašena

nacionalnim spomenicima, a takođe istim zakonom predviđena je i obaveza provođenja mjera za zaštitu, konzervaciju, prezentaciju i rehabilitaciju nacionalnih spomenika od strane Federalnog ministarstva prostornog uređenja.

S obzirom da opština Drvar i danas gaji i njeguje tekovine Narodnooslobodilačke borbe i baštini ideje antifašizma sa kojima se ponosi, te svake godine obilježava i slavi herojski otpor i pobjedu svijeta nad fašizmom, najmanje što svi zajedno možemo učiniti kao potomci istorijske generacije hrabrih rodoljuba jeste da ne dozvolimo dalje zarastanje u korov ovog istorijskog antifašističkog simbola čovječanstva uopšte, kako bi se oko ovog obnovljenog zdanja okupljali u budućnosti uz želju da se mračna istorija nikad ne ponovi.

AMANDMAN III

U odjeljku 52, glava 5201 Federalno ministarstvo kulture i sporta, ekonomski kod 615 Kapitalni transferi, 6151 Kapitalni transferi drugim nivoima vlasti i fondovima – Izgradnja sportske dvorane Mostar iznosi 3.500.000 KM. Naziv koda se mijenja i glasi Izgradnja sportske dvorane Mostar i Druga faza izgradnje sportske dvorane Glamoč, tako što Izgradnja sportske dvorane Mostar iznosi 3.000.000 KM, a Druga faza izgradnje sportske dvorane Glamoč iznosi 500.000 KM.

Obrazloženje :

Opština Glamoč dugi niz godina nije u mogućnosti da u cjelini realizuje jedan ovakav infrastrukturni projekat značajan prije svega za mlade i talentovane generacije koje godinama nemaju adekvatne uslove za bavljenje različitim sportovima, potom i za sve sportske klubove koji egzistiraju na području opštine, kao i za amaterski sport uopšte. U prethodnom periodu obezbjeđena su sredstva za prvu fazu izgradnje sportske dvorane koja uključuje izradu projektne dokumentacije, samu izgradnju objekta sa krovom i pripadajućom stolarijom, dok su za drugu fazu predviđeni svi unutrašnji radovi sa svim priključcima na postojećim infrastrukturnim mrežama.

AMANDMAN IV

U odjeljku 54, glava 5401 Federalno ministarstvo obrazovanja i nauke, ekonomski kod 614 Tekući transferi i drugi tekući rashodi, 6141 Tekući transferi drugim nivoima vlasti i fondovima – Transfer za završetak izgradnje zgrade SŠC u Travniku iznosi 5.000.000 KM. Kod mijenja ime i glasi Transfer za završetak izgradnje zgrade SŠC u Travniku i obnovu dječijeg vrtića

u Bosanskom Grahovu, u kom dio transfera za završetak izgradnje zgrade SŠC u Travniku iznosi 4.650.000 KM, a dio transfera za obnovu dječijeg vrtića u Bosanskom Grahovu 350.000 KM.

Obrazloženje :


Opština Bosansko Grahovo kao jedna od najrazrušenijih i najsiromašnijih opština u BiH je kao jedan od prioriteta, koji treba i simbolično i stvarno da najavi povratak normalnog života u ovu opštinu stavila rekonstrukciju i renoviranje dječijeg vrtića. Poslije dugo vremena ovaj objekat sa dječijim parkom ispred samog vrtića je očišćen od korova, ostataka ruševina i paljevina, čime je pokazana iskrena i jaka želja da se u narednom preiodu ispuni san svih Grahovljaka, a to je obnova ovog objekta.

Imajući u vidu da u Domu naroda Parlamenta FBiH predstavljamo najmalobrojniji narod u FBiH i dolazimo iz dijela FBiH u kome se nalaze 3 izuzetno nerazvijene povratničke opštine sa većinskim srpskim narodom, mišljenja smo da bi se usvajanjem ovih amandmana cjelokupnom stanovništvu ovih opština direktno poslala snažna poruka podrške i poštovanja za nadu i vjeru u bolje sutra. Napominjemo da se predloženim amandmanima ne narušava planirana budžetska struktura, ne vrše se promjene na prihodovnoj i rashodovnoj strani, već se predviđeni rashodi pravednije raspoređuju.


PRILOG : Fotografije

Sarajevo, 28.03.2022. godine

Podnosioci amandmana :



Goran Broćeta



Aleksandar Štrbac

